

Camp Kigali : Uducurama dushobora gushyira mu kaga ubuzima bw'abanyeshuri

Yanditswe kuya 13-08-2016 na Thamimu Hakizimana

<http://www.igihe.cm>



Iyo butangiye kwira turaguruka

Impungenege ni zose ku bafite abana biga muri Camp Kigali, abahakorera n'abanyura mu nkengero zaho ku bw'uducurama dusa n'utwabye icyorezo tuba mu biti byaho usanga dupfa igitondo n'ikigoroba.

Iyo unyuze hafi y'iki kigo uhasanga uducurama twinshi twapfuye dutera umunuko ukabije ibishobora no gutera indwara zitandukanye.

Impuguke mu ndwara zandura akaba n'umwarimu wigisha mu ishami ry'ubuvuzi muri Kaminuza y'u Rwanda, Dr Manzi Olivier yabwiye IGIHE ko agacurama ari inyamaswa y'inyamabere, ishobora gutera indwara abantu mu buryo bubiri.

Avuga ko agacurama gashobora gutera umuntu indwara iteye nk'ibisazi by'imbwa kakaba kayimutera mu gihe kamurumye.

Dr Manzi yagize ati "Akenshi na kenshi iyi ndwara ikunze gufata imbwa ku buryo rero agacurama karamutse kayiriye kakaza kuruma n'umuntu gashobora kuyimutera uretse ko iyo ndwara nta muntu yari yagaragaraho hano mu Rwanda."

Yongeyeho ko uducurama dushobora gutera ‘rougeole’ abana bakiri muni y’imyaka itanu igihe baba bariye ibiryo na two twariyeho ngo uretse ko bigoye cyane cyane kubera ko hafi 100% y’abana bo mu Rwanda baba barakingiwe.

Yagize ati “Gashobora kwanduza abana iyi ndwara mu gihe wenda bafashe nk’ibiryo biriho umwanda waturutse ku gacurama cyane cyane nko ku mbuto nk’amapera imyembe n’izindi bakazirya.”

Yongeyeho ko uducurama dushobora gutera na Ebola, ngo uretse ko iyo ndwara itari yagaragara mu Rwanda, ku buryo yabonye gusa abayobozi b’ishuri rya Camp Kigali gushyiraho itangazo ribuzza abana gukora ku ducurama twapfuye ndetse bakajya bihutira kudutwika kuko dushobora kubatera guhumeka nabi kubera uriya mwuka watwo.

Umubyeyi umwe utarashatse ko izina rye ritangazwa yagize ati “ Nimudukorere ubuvugizi bitewe n’uko bitabaye ibyo tuzashiduka abana bacu barwaye indwara tutazi kubera turiya ducurama kuko hari n’igihe usanga bari kudukinisha badukorakora.”

Icyo ubuyobozi bw’ishuri bubivugaho

Umuyobozi wungirije ushizwe amasomo muri Camp Kigali Mukarufonsi Marie Claudine avugako babangamiye cyane n’umunuko w’utu ducurama ngo ku buryo banamaze kwandikira ibarwa ubuyobozi bw’umurenge wa Nyarugenge kugira ngo ubafashe gukemura iki kibazo.

Yagize ati “ Turabibona ko ari ikibazo gikomeye yewe gishobora no kugira ingaruka ku buzima bw’abahatuye n’ubwacu tuhakorera ndetse n’ubw’abahagenda kuko haba hari umwuka mubi uretse ko twamaze kwandikira umurenge wa Nyarugenge kugira ngo badufashe guca amasoko y’abantu baza gucururiza amandazi n’ibindi bintu muni ya biriya bita turiya ducurama tubamo.”

Charles Havuguziga, Umunyamabanga Nshingwabikorwa w’Umurenge wa Nyarugenge we avugako badashobora kwica cyanga gukuraho utu ducurama ngo kuko ari **umutungo kamere w’igihugu** ndetse ari **n’inyamaswa zigenda zicika ku Isi**.

Yagize ati “ Twashyizeho abashinzwe kuhakora isuku ku buryo n’iyo twapfuye bahita badukuraho mu rwego rwo kuhakura umwanda ariko ntiwatwica cyane cyane ko ari ibinyabuzima.”

Yakomeje avugako hari isosiyete yitwa New Life ihanyura ikahakora isuku buri gitondo kugira ngo hatazagira abo dutera indwara.

Ishuri rya Camp Kigali rifite abanyeshuri bagera ku **2864** barimo abiga mu kiburamwaka, mu mashuri abanza n’ayisumbuye biyongeraho abakozi banyu.



Utu ducurama tuba twuzuye mu biti byo muri Camp Kigali



Uducurama twapfuye tuba twuzuye mu byatsi hafi y'ikigo cya Camp Kigali



Agacurama kazima kakimara kugwa mu muhanda wo hafi y'ishuri rya Camp Kigali